

Ni Pangulong  
Thomas S. Monson



# Mga Kanaryo nga may Bukay sa Ila mga Pakpak

**M**alapit na sa 60 ka tuig ang nagligad, bataon pa ko sadto sang nagaalagad ako bilang isa ka bishop, si Kathleen McKee, nga isa ka balo sa akon ward, nagtaliwan. Dala sa iya mga pagkabutang amo ang tatlo ka hinuptanan nga mga kanaryo (sahi sang pispis nga kolor-dalag ang balahibo sa bug-os nga lawas). Ang duha nga masiri ang pagkadalag, gintugyan sa iya mga abyan. Ang ikatlo, nga si Billie, ang pagkadalag nadagtan sang bukay sa iya mga pakpak. Si Sister McKee may ginbilin nga sulat sa akon: "Puede bala nga kamo sang imo pamilya ang magsagod sa iya? Indi sia ang pinakamatum pero sia ang pinakamanami magkanta."

Si Sister McKee daw pareho gid sang iya dalag nga kanaryo nga may bukay sa mga pakpak sini. Wala sia nabugayan sang katahum, nadulotan sang kaelegante, ukon napasidungan nga makaangkon sang kaliwatan. Apang ang iya amba nakabulig sa iban agud madala sing mas handa ang ila mga kabudlayan kag matuman sing mas maayo ang ila mga katungdanan.

Ang kalibutan napun-an sang dalag nga mga kanaryo nga may bukay sa ila mga pakpak. Ang masubo amo nga diutay gid lang ang nakatuon magkanta. Ang iban

mga lamharon nga wala makahibalo kon sin-o sila, ano'ng puede sila mangin ukon bisan pa luyag nga mangin; ang gusto lang gid nila amo ang mangin importante. Ang iban nagakuko sa katigulangon, ginapabug-atan sang pagkabalaka ukon napun-an sang pagpangduhaduha—nga nagapangabuhi nga kubos kaayo sa lebel sang ila mga ikasarang.

Agud magkabuhi sing dunganon, kinahanglan naton pauswagon ang ikasarang sa pag-atubang sang problema nga may kaisog, kapaslawan nga may kalipay, kag kadalag-an nga may pagpaubos. Mamangkot kamo, "Paano bala naton malab-ot ining mga tinutuyo?" Sabat nakon, "Paagi sa pag-angkon sang tunay nga pananawan kon sin-o gid kita!" Kita mga anak nga lalaki kag baba-yi sang buhi nga Dios, nga sa Iya dagway kita gintuga. Pamensara ina: *gintuga sa dagway sang Dios*. Indi kita matuod nga makapati sini nga wala nagaeksperiensya sang tuman nga bag-o nga igbalatyag sang kusog kag gahum.

Sa aton kalibutan, ang moral nga kinabatasan sa masami daw indi masyado kaimportante sangsa katahum ukon kaanyag. Apang gikan sang una pa nga panahon ang lay-gay sang Ginuo kay Samuel nga propeta nagabalik-balik:

"Ang Ginuo nagatan-aw indi subong sang pagtan-aw sang tawo; ang tawo nagatulok sa gwa nga dagway, apang ang Ginuo nagatulok sa tagipusuon" (1 Samuel 16:7).

Sang ang Manluluwas nagsangita sang isa ka tawo nga may pagtuo, wala niya ginpili ini gikan sa panong sang mga nagapabugal sang ila kaugalingon nga pagkamatarong nga pirme makit-an sa sinagoga. Kundi, Iya gintawag ini gikan sa mga mangingisda sang Capernaum. Ang nagapangduhaduha, wala'y alam, kupog-kupog nga si Simon nangin si Pedro nga Apostoles sang pagtuo. Ang isa ka dalag nga kanaryo nga may bukay sa iya mga pakpak nangin angay sang bug-os nga pagsalig kag wala'y katapusan nga gugma sang Manunudlo.

Sang ang Manluluwas nagsangita sang isa ka misyonero sang kaukod kag gahum, nasalapuan Niya ini indi sa tunga sang Iya mga sumulunod kundi sa tunga sang Iya mga kaaway. Si Saulo nga nagapangdaug-daog nangin si Pablo nga misyonero.

Ang Manunubos nagsangita sang di-perpektong mga tawo nga magtudlo sang alagyan padulong sa pagkaperpekto. Ginhimo Niya ini sadto. Ginahimo Niya ini karon—bisan pa sa dalag nga kanaryo nga may bukay sa ila mga pakpak. Gintawag Niya ikaw kag ako agud alagaran Sia diri sa Duta. Ang aton pangako dapat mangin bug-os. Kag sa aton paghimakas, kon mapaslawan kita, mag-ampo kita: "Tuytuyi kami, o tuytuyi kami, dakong Tagtuga sang katawhan, gikan sa kadudulman agud magtinguha sa liwat."<sup>1</sup>

Ang akon pangamuyo amo nga sundon naton ang halimbawa sang Tawo sang Galilea, nga makit-an nga nagaimpon sa mga imol, sa mga napaslawan, sa mga ginadaug-daog, kag sa mga nagaantos. Kabay nga may sinsero nga ambahanon nga maggikan sa aton mga tagipusuon sa aton paghimo sini.

#### TANDA

1. "Fight Song," Yonkers High School.

#### PAGTUDLO GIKAN SA SINING MENSAHE

**K**on magtudlo kamo . . . , masami makabulig nga papangitaon ukon papamotion ang mga nagatuon sang isa ka pat-od nga butang" (*Teaching, No Greater Call* [1999], 55). Agud buligan ang mga miyembro sang pamilya nga mahangpan ang mensahe ni Pangulong Monson, tilawi nga pangabayon sila nga mangin handa

sa pagpaambit sang ila natun-an pagkatapos nga mabasa ang mensahe sing dulungan. Agdaha ang tagsa nga magpaambit kon ano sa iya pamatyagan ang importante nga punto sa artikulo. Maghingapos paagi sa pagpaambit sang testimonya parte sa mensahe ni Pangulong Monson.

Ang pagtudlo sang pulong sang Dios, nga ginhatag paagi sa lya mga propeta, sarang mangin mabaskog nga impluwensya sa mga kabuhi sadtong aton mga ginatudlo-an (tan-awa sa *Teaching, No Greater Call*, 50). Si Pangulong Monson nagasiling nga may kusog kag gahum sa paghibalo nga kita mga anak sang Dios. Pagkatapos basa sang artikulo, pangabaya ang pamilya nga magpaambit kon ano ang nagabulig sa ila sa pagdumdom kon sin-o sila.

## LAMHARON

### Ano ang Tunay nga Katahum?

**S**i Pangulong Monson nagasiling sa sinining mensahe, "Sa aton kalibutan, ang moral nga kinabatasan sa masami daw indi masyado kaimportante sangsa katahum ukon kaanyag." Ang bataon nga mga babayi ayhan nagapangduhaduha nahanungod sa ila imahen sang kon sin-o sila kag kon ano ang sarang nila malab-ot. Binagbinaga ining mga panghunahuna parte sa tunay nga katahum gikan kay Elder Lynn G. Robbins sang Seventy:

- Ang isa ka bataon nga babayi nga ang dagway na-gasanag alangay sa kalipay kag katakos nagasabwag sang pang-sulod nga katahum.
- Ang manami nga yuhum tunay nga matahum sa pag-sabwag sini sa lubos nga natural nga paagi. Ining tunay nga katahum indi sarang ipinta kundi isa ini ka dulot sang Espiritu.
- Ang kaugdang isa ka pang-gwa nga tanda kag kinahanglanon para sa pang-sulod nga katahum.
- Kon wala ka nalipay sa imo dagway, makabulig nga tanawon mo ang imo kaugalingon sa mga mata sadtong mga nagapalangga sa imo. Ang tago nga katahum nga makita sang mga mahal sa kabuhi sarang mangin espiho para sa mga kaugalingon-nga-pagsanyog.
- Ang klase sang lalaki nga luyag pamanahon sang isa ka takos nga babayi "nagatan-aw indi" subong sang pagtan-aw sang isa ka natural nga tawo (tan-awa sa 1 Samuel 16:7). Sia mabihag sa tunay nga katahum nga ginasabwag sini gikan sa isa ka putli kag

malipayon nga tagipusuon. Ini matuod man sa isa ka bataon nga babayi nga nagapangita sang isa ka takos nga pamatan-on.

- Ang aton Amay sa Langit nagapaabot sa tanan Niya nga mga anak sa pagpili sang husto, nga amo lamang ang alagyan padulong sa wala'y katapusan nga kalipayan kag pang-sulod nga katahum.
- Sa Ginuo, wala sang pagpaindis-indis. Ang tanan may palareho nga prebilihiyo nga may lya imahe nga nakurit sa ila mga nawong (tan-awa sa Alma 5:19). Wala na sing mas tunay pa nga katahum.

Agud mabasa ang bilog nga mensahe, tan-awa sa Lynn G. Robbins, "True Beauty," *New Era*, Nob. 2008, 30. Ang mga pamatan-on makasalopo sang amo man nga laygay sa Errol S. Phippen, "Ugly Duckling or Majestic Swan? It's Up to You," *Liahona*, Okt. 2009, 36.

## KABATAAN

### Kantaha ang Imo Pinakamanami

**S**i Pangulong Monson nagsugid parte sa tatlo ka mga kanaryo ni Sister McKee. Ang duha puro dalag.

Kanami gid sa ila lantawon! Ang ikatlo indi amo sina kanami gid lantawon tungod may mga bukay ini sa iya sini mga pakpak. Pero palangga ini ni Sister McKee tungod kanami gid sini magkanta.

Ang pamatyagan sang iban nga tawo indi sila amo sina katahum ukon kaalam pareho sang iban. Apang ang tagsa ka tawo importante sa Ginuo. Sarang kita mangin tampad kag maisog kag maggamit sang aton mga talento sa pag-alagad sa iban. Nian kita kasubong sang dalag nga kanaryo nga may bukay sa iya sini mga pakpak. Indi kita perpekto, pero nagakanta kita sang aton pinakamanami!

Magsulat sang tatlo ka mga paagi nga sarang ninyo kantahan ang inyo pinakamanami para sa Ginuo.

Sarang ko kantahan ang akon pinakamanami para sa Ginuo paagi sa:

1. \_\_\_\_\_
2. \_\_\_\_\_
3. \_\_\_\_\_

© 2010 iya sang Intellectual Reserve, Inc. Tanan nga mga kinamatarong ginahuptan. Ginbalhag sa Pilipinas. Petsa sang pagtugot sa Ingles: 6/09. Petsa sang pagtugot sa paglubad: 6/09. Linubad sang *First Presidency Message, June 2010*. Hiligaynon. 09366 861

# Pagbag-o sang mga Kasugtanan paagi sa Sakramento



*Itudlo ining balaan nga mga kasulatan kag sinambit nga mga pulong ukon, kon kinahanglanon, isa pa ka prinsipyo nga magabugay sa mga utod nga babayi nga inyo ginabisita. Magpanaksihon parte sa doktrina. Agdaha ang inyo mga ginabisita nga magpaambit sang ila nabatyagan kag natun-an.*

## Si Jesucristo Nagpahamtang sang Sakramento

“Nagkuha si Jesus sing tinapay, [kag] ginpakamaayo kag gintipik-tipik ini, kag ginhatac sa [iya] mga Gintoton-an, [kag] nagsiling, ‘Kuha, kaon’ (Mat. 26:26). ‘Ini among akon lawas nga ginahatag tungod sa inyo: himoa [ninyo] ini sa handumanan nakon’ (Lucas 22:19). Sa amo man nga bagay ginkuha niya ang tagayan sang alak nga sa kinaandan ginasimbogan sang tubig, nagmitlang sang bendisyon sa pagpasalamat para sini, kag ginpara ini sa mga nagapalibot sa iya nga nagasiling: ‘Ining tagayan amo ang bag-ong katipan sa akon dugo,’ ng Ginaula. . . sa kapatawanan sang mga sala.’ ‘Himoa ninyo ini sa handumanan nakon.’ . . .

“Sumugod sadtong eksperiensya sa ibabaw nga hulot sang bisperas

sang Getsemani kag Golgota, ang mga anak sang saad napaidalom sa kasugtanan nga dumdumon ang sakripisyo ni Cristo sa sining mas bag-o, mas mataas, mas balaan kag personal nga paagi.”<sup>1</sup>

*Elder Jeffrey R. Holland sang Korum sang Napulo'g Duha ka mga Apostoles.*

## Ginabag-o Naton ang Aton mga Kasugtanan sa Pagbunyag paagi sa Sakramento

“Kon mabunyagan kita, ginalda naton sa aton mga kaugalingon ang sagrado nga ngalan ni Jesucristo. Ang pagdala sa aton kaugalingon sang Iya ngalan amo ang isa sang pinakaimportante nga mga eksperiensya naton sa kabuhi. . . .

“Tagsa ka semana sa sakramento miting nagasaad kita nga dumdumon ang sakripisyo sang aton Manluluwas sa pagtubos sa aton gikan sa aton mga sala samtantang ginabag-o naton ang aton kasugtanan sa pagbunyag. Nagasaad kita nga maghimo subong sang ginhimo sang Manluluwas—nga mangin matinumanon sa Amay kag pirme tumanon ang Iya mga kasuguan. Ang pagpakamaayo nga ginabaton naton sa baylo amo ang dalayon

## MGA BULIG PARA SA VISITING TEACHING

Kon makilal-an mo na sing maayo ang isa ka utod nga babayi kag ang iya pamilya, magpangita sang mga paagi nga sarang mo sia mabuligan sa pagbag-o sang iya mga kasugtanan paagi sa sakramento. Kon wala sia nagatambong sa sakrament miting, puede mo bala sia agdahan sa pagtambong ukon tanyagan sang bulig agud mahimo niya ini (salakyen ukon plete, bulig sa pag-atipan sa kabataan, isa ka abyan nga masugilanon, kag madamo pa)?

## PERSONAL NGA PAGPANGHANDA

Lucas 22:19–20

1 Mga Taga-Corinto 11:23–28

3 Nefi 18:1–12

nga makaupod naton ang Iya Espiritu.”<sup>2</sup>

*Elder Robert D. Hales sang Korum sang Napulo'g Duha ka mga Apostoles.*

“Nakaupod ko ang isa ka waloka-tuig nga bata nga babayi sa adlaw sang iya bunyag. Sa katapusan sang adlaw iya gid ginpabugal, ‘Ginbunyagan ako sa bilog nga adlaw kag wala pa gid ako makasala bisan kis-a’! Apang ang iya perpekteto nga adlaw wala naglawig gid, kag nakasiguro gid ako nga nahi-baloan na niya sa karon, subong

nga nahibaloan man naton tanan, nga bisan ano naton nga pagtinguha, indi naton pirme malikawan ang tagsa ka malain nga sitwasyon, tagsa ka sala nga pagpili. . . .

“. . . Indi posible ang maghimo sang matuod-tuod nga pagbag-o sa aton lamang kaugalingon nga paghimakas. Ang aton kaugalingon nga determinasyon kag aton

kaugalingon nga maayong mga intensyon indi bastante. Kon makasala kita ukon makapili sang indi maayo, kinahanglan naton maangkon ang bulig sang aton Manluluwas agud makabalik sa husto nga banas. Nagaambit kita sang sakramento tagsa ka semana agud ipakita ang aton pagsalig sa Iya gahum nga makapabag-o sa aton. Nagatuad kita

sang aton mga sala kag nagasaad nga talikdan ang mga ini.”<sup>3</sup>

*Julie B. Beck, pangkabilugan nga pangulo sang Relief Society.*

#### **MGA TANDA**

1. Jeffrey R. Holland, “This Do in Remembrance of Me,” *Ensign*, Nob. 1995, 67.
2. Robert D. Hales, “The Covenant of Baptism: To Be in the Kingdom and of the Kingdom,” *Liahona*, Ene. 2001, 8.
3. Julie B. Beck, “Remembering, Repenting, and Changing,” *Liahona*, Mayo 2007, 110–11.